



A-N-T-I

Aliansa Nasionál Timor-Leste ba Tribunál Internasionál
(THE TIMOR-LESTE NATIONAL ALLIANCE FOR AN INTERNATIONAL TRIBUNAL)

Tel: +670-3321040 or +670-77234330 or 77367518 / 77237176
e-mail: lanarra.del@gmail.com or atino@laohamutuk.org

Ami senti laran dodok tebes

Tanba imi hahu haluha no ignora sofrémentu istoria pasadu ne'ebé mak sei kanek hela...!

Ohin tama ba laron 3 enkontru boot Parseiru Dezenvolvimentu iha Timor-Leste. ANTI nota katak kontiudu husi enkotru Parseiru Dezenvolvimentu ne'e la sita asuntu justisa liu-liu kazu violasaun direitus umanus pasadu nian. Ami konsidera Doadores sira hatudu deit "laran sorin" ka la hatudu sentidu seriadade ba dezenvolvimento iha aspeitu tomak. Nune'e kria nafatin natureza lakunas iha sosiadade nia leet.

Tuir nutisia ne'ebe fo sai iha *Antara News* <http://www.antaraneews.com/en/news/89276/prabowo-exchange-experience-with-former-timor-leste-pm> katak iha 10 Juñu 2013 iha sorumutu entre Prabowo Subianto, Wiranto ho Mari'i Alkatiri iha Jakarta-Indonézsia. Enkontru entre lider Timor-Leste ho ema sira ne'ebé mak nuudar autor ba violasaun direitus umananus ne'e akonsetese fila-fila desde tinan 2004. Konforme nutisia haktuir katak Sr. Mari'i Alkatiri vizita edifisiu partido GERINDRA hodi hasoru malu ho Prabowo no ninia strutura partidu GERINDRA nian. Iha momentu ne'e Prabowo hato'o katak vizita ne'e privilejju ba Prabowo ho nia strutura sira. Ho nutisia ne'e halo ema Timor oan tomak hakfodak no laran taridu tanba lori ita tomak nia memoria hodi lembra fali asaun brutalisme ne'ebe uluk Militar Indonézia liu-liu KOPASUS sira halo hasoru ema sívil inosente iha Timor-Leste durante tempu okupasaun rezime militar Indonézia nian.

I ta sei lembre nafatin iha ita nia memoria ho aktu violasaun direitus umanus ne'ebé militar Indonézia liuliu KOPASUS sira komete. Bazeia ba relatóriu CAVR nian hatudu katak skala violasaun seksuál sae maka'as relasiona ho detensaun masal husi tinan 1978 -1983. Depois tinan 1983, Kopassandha/Kopasus (Pasukan Khusus Indonézia) hala'o detensaun dala atus resin no torturasaun iha tinan 1984 no 1986. Ezemplu detensaun ne'ebé iha ligasaun insidente sira iha Mauchiga (Hatu Builico, Ainaro) no Kraras, Bibileo, (Viqueque). Prabowo nia invovimento direita iha Masakre Craras, Bibileo. Alemde ne'e Prabowo nia elementus mos involve iha masakre Santa Cruz (1991)

Kazu violasaun seksuál hirak ne'e akontese iha pos militar ka markas militar nian. Iha tinan 1976 Prabowo sai ona nuudar Komandante Pleton Pra Komando Grupu I Komando Pasukan Sandhi Yudha (Kopassandha) ne'ebe hahu lidera operasaun Tim Nanggala iha Timor. Ita hatene momos iha involvimentu makas tebes ba aktu violasuan direitus umanus ne'ebé Prabowo halo iha tempo ne'ebá, iha tinan 1983, no iha altura ne'ebé nuudar Kapitaun.

Streiñu tebes, Prabowo nuudar komandante ida iha altura ne'ebá tenke livre husi aktus violasaun direitus umanus ne'ebé nia ho nia elementus sira komete. ANTI hare katak, kualker asaun ne'ebé membru Kopasasus sira halo hodi halo asasinasaun hasoru ema sívil Timor-oan ne'e hetan orientasaun husi nia komandante, mak Prabowo.

Tuir relaóriu CAVR ne'e katak maiz ou menus ema 102.800 mak mak mate tanba oho, hamlaha no lakon iha períódu konfliktu nian laran. Maibe iha estimasaun balu ne'ebé barak liu husi total ne'ebé mensiona iha relatóriu laran. Liu tan ida ne'e maiz ou menus ema 250.000 mak hetan obrigatoriu deporta ba teritóriu Indonézia no labarik rihun 4 liu mak militar Indonézia lori ba Indonézia no too ohin laron familia sira laiha informasaun ruma ba sira nia situasaun. Ema atus 8 resin mak lakon obrigatoriu no too ohin laron laiha paradeiru.

Iha tinan nia rohan "Setembru Negro" 1999, Komisaun Direitus Umanus ONU hala'o plenaria spesial hodi debate violasuan direitus umanus iha Timor-Leste. Iha plenaria spesial ida ne'e foin realiza ba dala-4 iha istoria Komisaun nian. Komisaun kondena makas ba "krime kontra direitus umanus no lei umanitaria internasionál ne'ebé sistematiku no planeadu" no apela atu autór kriminozu sira lori ba tribunál. Komisaun mos ejize ba Sekretariu Jerál ONU atu forma Komisaun Inkeritu ida. Nune'e la kleur, Señor Kofi Annan hili Komisaun Inkeritu Internasionál ba Timor-Leste (International Commission of Inquiry on East Timor – ICIET). ICIET consege hala'o mandatu hodi vizita mai Timor-Leste no Indonézia iha fulan Novembru – Dezembru 1999. ICEIT konklui katak "iha krime sériu ba violasaun direitus umanus no krime kontra lei umanitaria ne'ebé iha akontese durante tempu naruk ho tipu intimidasaun, teror, estraga sasan, violasaun hasoru fetu no muda ema ho obrigatoriu". Iha tempo hanesan ONU delega team spesial mai Timor-Leste iha Dezembru 1999. Delegasaun spesial direitus umanus hato'o nia rekomendasaun ba ONU atu hari'i Tribunál Internasionál bainhira Governu Indonézia la ho efetivu ka falla hodi julga autór kriminozu sira hodi hata'an iha Tribunál.

Bainhira ICIET hasai nia relatóriu, Altu Komisaris ONU ba asuntu direitus umanus Mary Robinson hateten katak, "Relatóriu Komisaun Inkeritu hato'o mensajem ida ba povo Timor-Leste katak comunidade internasionál la haluha sira nia sofrémentu. Hau hein katak esforsu hodi lori ema sira ne'ebé responsabiliza ba aktu brutalidade iha Timor-Leste hetan responsabilidade atu nune'e laiha impunidade".

Maibe to'o ohin laron, perpetrator sira sei seidak hetan akuntabilidade ba aktus violasaun direitus umanus ne'ebé sira komete. Pior liu, kazu ba krime grave pasado

ema hahu haluha no ignora. Oinsa bele hakotu korenti impunidade bainhira laiha prosesu formal ruma ba sira ne'ebé nuudar perpetrator prinsipal iha aktu violasaun direitus iha Timor-Leste durante okupasaun nia laran.

Tanba ne'e ANTI apela no ejize komitmentu husi comunidade internasionál ba aktu violasaun sira ne'ebé akontese iha Timor-Leste durante tempu okupasaun Indonézia atu hetan akuntabilidade liuhusi prosesu ida ne'ebé justu no kredível.

1. Apela ba comunidade Internasional inklui povo Estados Unidos Amerika, Eglatera, Franca, Oanda, Norwergia, Alemaña, Australia no Povo kontinental iha region Latin Amerika, Afrika no Asia atu empeña imi nia obrigasaun moral tuir lei umanitaria internasional. Lilu ba ETAN no Amenesty Internasional atu nafatin tau matan no kontinua follow up kazu krime grave ne'ebé akontese iha Timor Leste.
2. Ejize ba doador sira atu fo atensaun ba kazu krime kontra humanidade iha Timor-Leste duranti tempu okupasaun militar Internasia atu hetan prosesu formal nune'e bele garanti hakotu korenti impunidae tamba asuntu pasado nudar aliserse ba desenvolvimento demokrasia agora no iha futuro.

ANTI konsidera la justu bainhira comunidade internacional hahu abandona ami ba dala ida tan nune'e husik hela ema Timor oan mak tenke asumi responsabilidade hodi ezizi prosesu akontabilidade ba violasaun direitus umanus ne'ebe akontese iha Timor-Leste.

Dili, 20 Juñu 2013

Membru:

1. Asosiasaun HAK
2. Judicial System Monitoring Program (JSMP)
3. La'o Hamutuk
4. Fokupers
5. Asosiasaun *Chega ba Ita* (Acbit)
6. MDI
7. CDI
8. Luta Hamutuk
9. Kadalak Sulimutu Institutu (KSI)
10. Asososiaun Vítima 74-99
11. Front Mahasiswa Timor-Leste
12. Forum Tau Matan (FTM)
13. Sek. Fongtil
14. Haberan Institut
15. Asean Justice and Rights (AJAR) – Timor-Leste